

Nec diutius quam respondit moratus, admoveri jubet scalas: conantibusque ceteris evadit in murum. Angusta muri corona erat: non pinnae sicut alibi fastigium ejus distinxerant; sed perpetua lorica obducta, transitum sepserat. Itaque rex haerebat magis, quam stabat in margine, clypeo undique incidentia tela propulsans; nam ubique eminus ex turribus petebatur. Nec subire milites poterant, quia superne vi telorum obruebantur; tandem magnitudinem periculi pudor vicit: quippe cernebant cunctatione sua dedi hostibus regem. Sed festinando morabantur auxilia; nam dum pro se quisque certat evadere, oneravere scalas; quibus non sufficientibus devoluti, unicam spem regis fefellerunt. Stabat enim in conspectu tanti exercitus, velut in solitudine destitutus.

## (LIB. VIII. c. 5.)

Jamque laevam, qua clypeum ad ictus circumferabat, lassaverat, clamantibus amicis, ut ad ipsos desiliret, stabantque excepturi; quum ille rem ausus incredibilem atque inauditam, multoque magis ad famam temeritatis, quam gloriae insignem. Namque in urbem hostium plenam praecipiti saltu semetipse immisit; quum vix sperare posset dimicantem certe, et non inultum esse moriturum: quippe antequam adsurgeret, opprimi poterat, et capi vivus. Sed forte ita libramerat corpus, ut se pedibus exciperet; itaque stans in pugnam; et ne circumiri posset, fortuna providerat. Vetusta arbor, haud procul muro, ramos multa fronde vestitos velut de industria regem protegentes, objecerat: hujus spatioso stipiti corpus, ne circumiri posset, adplicuit, clypeo tela, quae ex adverso ingerebantur, excipiens. Nam quum unum procul tot manus peterent, nemo tamen audebat propius accedere: missilia ramis plura, quam clypeo incidebant. Pugnat pro rege primum celebrati nominis fama: deinde desperatio, magnum ad honeste moriendum